

SUNS EUROPE, IL PIU IMPUARTANT FESTIVAL EUROPEAN DES ARTS IN LENGHE MINORITARIE AL TORNE A UDIN

La cuinte edizion dal proget di ponte de ARLeF tal setôr dal spetacul, si davuelzarà in citât dai 28 e ai 30 di Novembar

Suns Europe al è daûr a tornâ: il festival des arts in lenghis minoritariis de Europe, lûc di confront e incuintri des miôrs produzionis artistichis in lenghe minoritarie su scjale europeane, si davuelzarà ancje chest an a Udin ae fin di Novembar. Propit pe sô dimension internazionâl e contemporanie, e pe sô maniere di promovi e meti in rê a nivel internazionâl lis lenghis mancudis, Suns Europe al jentre tra i progetis di ponte finanziâts de ARLeF.



Il program dal festival al è cetant siôr di events. Dai 28 ai 30 di Novembar, a Udin al sarà un corisi daûr di apontaments che a àn l'obietîf dopli di promovi produzionis artistichis ricercjadis e originjâls, ma ancje di mostrâ cemût che la diversità linguistichis in Europe, in plui di jessi une ricjece culturâl e un dirit di fonde, e je une risorse creative inestimabile.

Par resonâ su chescj dirits, sui vantaçs e su lis oportunitâts dal plurilinguism,

te buinore di sabide ai 30, in graciis de ARLeF, si davuelzarà ancje chest an Scuele Europe, la lezion-conciert pai students de scuelis secundariis di secont grât dal teritori furlan. Une ocasion uniche, che ogni an e cjape dentri uns 500 students, par fevelâ de

educazion plurilengâl e de citadinance multicultural, acompagnade de musiche dal vîf dai artiscj finaliscj di Suns Europe.

Za de metât di Novembar, Suns Europe al puatarà ator pal Friûl la musiche dai vincidôrs e dai protagoniscj des edizions passadis dal festival, che a sunaran insiem i artiscj furlans protagoniscj de sene musicâl di chest an.

La manifestazion e jentre tal vîf a Udin di joibe ai 28 fin a sabide ai 30 di Novembar, cun incuintris su la letature in lenghe furlane, antepimis cinematografichis al Cinema Centrale, *reading* di poesiis scritis fintremai sui vistîts.

Il grant finâl, come di tradizion, al sarà sabide ai 30 di Novembar des

21 indenant tal Teatri Gnûf "Giovanni da Udine", cul concierton finâl che al maravearà il public intune sere fate di musiche, di culturis e di artiscj, a dimostrazion de bielece dal plurilinguism e de modernità des lenghis minoritariis europeans.

In cheste cuinte edizion, il festival si colore di musiche rock, punk, hard rock e psichedeliche, di ritmis pop&soul, krautrock, cumbia, dub e rap, ma ancje di une cumbinazion dal dut gnove di jazz e musiche classiche. I artiscj a vegnin de Sardegne, dal Paîs Basc, dal Gales, dal Cjanton dai Grisons, des isulis Faer Oer, de Galizie, de Ocitanie francese, dai Paîs Catalans, de Basse Sassonie e, clâr, dal Friûl.

I biliets a son za a disposizion al di bilietarie dal Teatri Gnûf, intes rivenditis autorizadis e in rê su vivaticket.it

Dongje de poie de ARLeF, de Regjon Autonome F-VJ e de Fondazione Friuli, il Festival al gjolt dal jutori e dal patrocin dal Consei de Europe e di tancj sogjets publics e privâts, furlans e internazionâi. Par dutis lis informazions sul festival, al baste lâ su la sô pagine Facebook:

@SunsEuropeFestival

Pagine par cure de ARLeF - Agjenzie Regional pe Lenghe Furlane



SUPERMERCATO

PRODOTTI
GENUINI
E CONTROLLATI



Via Fiore dei Liberi, 32 Premariacco (UD) - Tel. 0432.729005 - info@premariacco.coop - www.premariacco.coop